

*Colaborazion tra Regjon, ARLeF e Filologjiche*

## Screât DOCUSCUELE, il Centri di documentazion e ricercje pal insegnament de lenghe furlane

La scuele furlane e à cumò a disposizion un gnûf imprest a pro dal insegnament dal furlan: DOCUSCUELE, il Centri di documentazion, ricercje e sperimentazion didatiche che al à sede li de Societât Filologjiche Furlane a Udin.

Il progjet al nas di un acuardi firmât de Agenzie Regjonâl pe Lenghe Furlane e de Filologjiche, daûr de volontât dal Assessorât regjonâl ae Istruzion e cul supuart dal Ufici Scolastic Regjonâl.

«DOCUSCUELE al è un altri progjet strategic di politiche linguistiche e di educazion plurilingâl che al à il fin di meti in rêl progjets e competencis e di creâ ocasionis di confront, di inricjiment e di ideazion» al à declarât Lorenzo Fabbro, president de ARLeF, che al à ancje ricuardât cemût che di chest progjet a fossin aromai za cetancj agns che si fevelave.

La intese firmade e previôt che la Agenzie e varà compits di direzion e di coordinament dal progjet ancje cul supuart dal propri Comitât tecnic scientific e e metarà a disposizion dal Centri lis risorsis economicis pal so funzionament e pal disvilup dai programs che a saran soredu su la didatiche inovative e su la formazion.

DOCUSCUELE al è stât presentât a Udin tal Auditorium de Regjon dulà che a son intervignûts duj i rapresentants des istituzions



che a àn volût la realizazion dal Centri, ma ancje e soredu une vore di int che e à jemplât duj i 300 puecj a disposizion. Chest entusiasim al conferme l'interès che al è tai confronts de lenghe furlane, soredu tal ambit de didatiche: la domande di insegnament de lenghe furlane a scuele di bande des fameis tai ultins agns e je cressude, rivant al 73 per cent, e si fevele di 43 mil students. Cun di plui, te ocasion a son stâts distribuîts ai insegnants i fascicui "Marilenghe te scuele", che a metin dongje une schirie di esperiencis didaticis inovativis e che a rapresentin un lavôr che al da ai docents un esempli concret

di buinis praticis che a puedin jessi di jutori ae creativitat personâl par meti in vore gnûfs svilups di insegnament.

La stesse assessore regjonâl pal Lavôr, formazion e istruzion, Loredana Panariti, e à marcât la impuartance di DOCUSCUELE che «al judarà, su la fonde des esperiencis presintis in altris contescj talians e internazionâi, a meti i insegnants di lenghe furlane intes cundizions di confrontâsi te suaze culturâl e in maniere professionâl cui coleghis de proprie scuele, di altris contescj talians minoritaris e europeans e cun duj i interlocutors interessâts ai problemis de scuele e de educazion».

Si è cussì screât chel che al à intenzion di diventâ un vèr e propri pont di riferiment pai insegnants impegnâts inte introduzion de marilenghe intai programs formatifs dai istitûts dal Friûl. Ancje par cheste motivazion Federico Vicario, president de Societât Filologjiche Furlane, al à pandût il so agrât ae Regjon e ae ARLeF: «Par nô e je une grande sodisfazion viodi ricognossude la funzion strategjiche dal Centri su la scuele furlane». DOCUSCUELE al à sede li de Societât Filologjiche Furlane, Palaç Mantica, vie Manin 18 - 33100 Udin e al è viert dal lunis al vinars des 9 aes 13 e su apontament, tel. 0432.501598 (int. 5), email: info@scuelefurlane.it



## INT / ART: gnove serie TV e web su la identitât linguistiche cjantade e sunade dai artiscj furlans emergjents

Si clame INT/ART e al è un progjet de societât Agherose di Udin, realizât cul finanziament de Agenzie Regjonâl pe Lenghe Furlane e dal Font regjonâl pal Audiovisîf. Si trate di cuindis documentaris pensâts pe TV e pal Web (www.int-art.eu) e dividûts in trê seris che a vuelin contâ la realtât artistiche dal Friûl midiant de vôs dai siei protagoniscj: musiciscj, rapresentants des arts visivis, scritôrs, atôrs di teatri e artiscj de danze.

La prime serie, dedicate ae musiche, e je za lade in onde su RAI3 regjonâl: Dek III Ceesa, Elsa Martin, Rudy Citossi, Caia Grimaz e Alessandro Mansutti a son stâts i zovins protagoniscj che si son con âts a Dorino Minigutti, il regist di Udin che al à ideât il progjet e che al comente: «Al è interessant viodi il rapuart che al lee la produzion di un artist cu la sô lenghe mari. No je dome une relazion che si fonde su lis peraulis, si ben une cubie che e met dongje locâl, pal ûs de lenghe furlane, e internazionâl, pe puartade divulgative dal progjet (dongje dal sît internet e je ancje une fanpage su Facebook)».

«Il progjet di INT/ART al rapresente une des otimis produziions che, confermant il snait creatif e la alte professionalitât dai produtôrs independents furlans, la ARLeF e à podût sostignî intal ultin periodi» al dis Lorenzo Fabbro, president de Agenzie.